

LO MULET É LO TCHARÉTÓN

PATOIS DE CHALLAND-SAINT-VICTOR

(PAR BRUNA DARBAZ)



[1-2] Un co y ie un mulet, un piquiò mulet, qué alae to fyir, galopae é damouae avó lé minà dou vuladjo. Un djor tchi minà y an deut : « Ah, ma totùn, comèn saet bé sé lo mulet isse un tcharétòn ! ».

[3-4] Donca lo payos y at deut : « É bin, vo lo fout mè lo tcharétòn ! ». Y at donca pré d'assòn, y at pré lo marté, y at pré la résetta, y at pré la taivéla, y at pré lé quiò, y at rabotà, y at resà, coppà, tchapotà, é pin é poun, é pin é pan... y at fét un bé tcharétòn.

[5-6] Apré y at fét co lé rouè dé bohç, y at bita-iu un bé serquio outor é y at mounta-le ou tcharétòn. Djacque, tchi minà y ion fran èzu ! É lo mulet co dé pieu : ieu devàn é lo tcharétòn apré !

[7-8] Lé minà i tchardjaon la fruta can y alaon rétchayì lé pomme. Un dzor y an impyì lo tcharétòn dé pomme é lo mulet iù dizae : « Na paè, y é trò pézàn ! ».

[9-10] Ma lé minà y an pa ehcouta-lo, y an bità co mas dé pomme. Paè, can lo mulet y et modà, lo tcharétòn... y at fét crac ! Lo mulet y at bita-se a pioué : « Naaaa, lamonguiou... lo min bé tcharétòn ! ».

[11-12] Boneur qué lo payos y at capità dé passé dé lai é y at deut : « Ma coui y et qué i pioue ? ». Lé minà y an deut : « Ah, y et lo mulet perquè lo tcharétòn y et rot ».

[13-14] Donca lo payos y at déhtacà lo tcharétòn, y at tornà prene lo marté, la taivéla, lé quiò, é pin é poun, é pin é pan... y at alovà lo tcharétòn.

[15-16] Lo mulet y ie to contèn, ma y at deut : « Minà, i vo fat pamà bité tro dé pomme su lo min tcharétòn ! ». É lé minà dou vuladjo, to contèn qué lo piquiò mulet y ae quiuttà dé pioué, y an fét un bé tor outor dou tcharétòn.